

समे – 12:25 hrs.

<><><><><><>

PM-MKB

प्रधानमंत्री नरेन्द्र मोदी होर अज्ज अपने माहवार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे कीते। प्रधानमंत्री होरें आखेआ ऐ जे समूलचे राष्ट्र गी वोकल फॉर लोकल, आत्मनिर्भर भारत ते विकसित भारत दे मंतर कन्नै अगड़ा बधना होग। श्री मोदी होरें आखेआ जे त्यौहारें दे उत्सव दे दरान सफाई बक्खी चेचा ध्यान दिता जा तां जोश होर बधी जंदा ऐ। उंनै आखेआ जे एक भारत-श्रेष्ठ भारत दी भावना देशें दे विकास लेई बड़ी ज़रूरी ऐ ते एहदे च खेड़ें दी भूमिका बड़ी बड़्डी ऐ। श्री मोदी होरें श्रीनगर च आयोजित पैहले-पैहले खेलो इंडिया वाटर गेम्स उत्सव दी चर्चा कीती जेहदे च मुख्य भरै दे 800 खड्गारिएं हिस्सा लैता हा। इस आयोजन दे दरान प्रधानमंत्री होरें द’उं खड्गारियें- ओडिशा दी रश्मिता साहू ते श्रीनगर दे मोहसिन अली हुं’दे कन्नै गल्लबात कीती जि’नै सुन्ने दे तगमे जिते हे। प्रधानमंत्री होरें आखेआ जे जम्मू-कश्मीर दे पुलवामा जिले च रॉयल प्रीमियर लीग लेई आयोजित दिन-रात दे पैहले क्रिकेट मैच च रिकार्ड गिनतरी च खेड़प्रेमी शामिल होए। उंनै आखेआ जे ज्हरां बद्धे लोक, खासकरियै युवा, पुलवामा च रातीं’लै क्रिकेट खेड़ना पसंद करदे न जेहड़ा इक दिक्खने-जोग नजारा हुं’दा ऐ। प्रधानमंत्री होरें इब्बी आखेआ जे बरसांती दी इस रूतै दरान कुदरती क्रोपियां देशें लेई म्तेहान दी घड़ी हुंदि’आं न। पिच्छले किश हफ्तें दे दरान देशें च हाडें ते ल्हास-पस्सियें करी बड़्डे पैमाने पर बनाश

होआ ऐ। श्री मोदी होरें इब्बी आखेआ जे एकड़ी घटनाएं हर देशवासी गी दुखी कीता ऐ ते पीड़ित परोआरें केई अपनै गी मुहाई दिता ऐ। उं'दा सब्भनै दा दर्द साढ़ी सब्भनै दी सांझी पीड़ ऐ। उंनै आखेआ जे जित्थे कुतै बी आपदा आई ऐ, राश्ट्री आपदा मोचन बल, राज्य आपदा मोचन बल ते होरनै सुरक्षाबलें- सब्भनै लोकें दी जान बचाने लेई दिन-रात इक्क करी दिता। प्रधानमंत्री होरें आखेआ जे सैनिकें गी तकनीक बी मुहैया करोआई गई ऐ। उंनै आखेआ जे थर्मल कैमरा, लाइफ डिटेक्टर, खोजी कुतै ते ड्रोन ज्नेह आधुनिक संसाधनै दी मदाद कन्नै राहत कम्मै गी तेज करने च मदाद मिली ऐ। प्रधानमंत्री होरें डिजिटल ऐप 'प्रतिभा सेतु' दी चर्चा कीती जेहदे च ओकड़े मेदवारें दा डेटा सुरक्षित रक्खेआ जं'दा ऐ जि'नै संघ लोक सेवा आयोग-यूपीएससी दे म्तेहानें दे हर चरण गी पार ते कीता, पर अखीरली मेरिट-सूची च थाह हासल नेई करी सके। उंनै आखेआ जे इस पोर्टल दे राहें निजी कंपनियां ऐकड़े काबल विद्यार्थियें कन्नै जुड़ी दी जानकारी लेइयै उंनैगी रोजगार देई सकदि'आं न। श्री मोदी होरें आखेआ जे ऐसे सैकड़ें काबल नौजवानें गी इस पोर्टल दे राहें तुरत रोजगार मिलेआ ऐ जेहड़े बड़े ममूली फर्क कन्नै खुंजी गे हे। हून एह नौजवान बी पूरे आत्मविश्वास दे कन्नै अगड़े बधा करदे न।

<><><><><><>

Special-Trains

भारी बरखें ते कुदरती क्रोपिणं दे करी जम्मू खिते च फसे दे यात्रियें दी मदाद आस्तै रेलवै नै अज्ज जम्मू थमां त्रै बशेश रेलगड्डियां चलाने दा ऐलान कीते दा ऐ। पैहली रेलगड्डी अज्ज दपैही 2 बजे मोरादाबाद, लखनउ ते वाराणसी जंक्शन हुंदे होई कोलकाता लेई रवाना होग।

जिसलै के दुई रेलगड्डी संझां 4 बजे नमीं दिल्ली होंदे होई चेन्नेई सेंट्रल लेई चलोग। इस्से चाल्ती त्रीऽ रेलगड्डी गी अज्ज संझां 6 बजे कठुआ ते पठानकोट कैंट दे राहें नमीं दिल्ली लेई रवाना करने दा फैसला लैता गेदा ऐ। एह सब्भै रेलगड्डियां बुकिंग ते आरक्षण लेई उपलब्ध न। कुसै बी सहायता जां जानकारी लेई लोक एन.टी.ई.एस ऐप्प पर जाई सकदे न जां फही 139 नम्बरै पर राबता करी सकदे न।

<><><><><><>

GDP-Reactions

माहिरें-बशेशजें, मजूदा माली बरे दी अप्रैल शा जून आहली पैहली तिमाही च भारत दे सकल घरेलू उत्पाद दी विकास दर च दर्ज कीते गेदे जबरदस्त बाद्दे दी सराहना कीती ऐ। इस शानदार उपलब्धि पर मन्ने परमन्ने दे अर्थशास्त्री सिद्धार्थ कालहंस होरें आखेआ ऐ जे ओह मन्नदे न जे भारती अर्थबवस्था आसेआ कीता गेदा एह प्रदर्शन मेदें कोला पार ऐ ते एह अग्गे बी भारती अर्थबवस्था दे मजबूत बने दे रौहने दी सारत बी देआ करदा ऐ। तोआई जम्मू च बी लोकें, भारत दी विकास दर च आए दे इस बाद्दे पर खुशी जतांदे होई आखेआ ऐ जे एह सरकार दिएं तगड़ी नीतिएं ते भारती अर्थबवस्था दी मजबूती गी दर्शादा ऐ।

<><><><><><>

Ayush-Ramban

रामबन जिले च बरखें ते हाडत्रें सवां प्रभावित लोकें दी मदद लेई मैहकमा आयुष नै बी कई कैंप लोआइयै लोकें गी डॉक्टरी जांच ते मुफ्त दोआइएं दी सुविधा उपलब्ध कराई ऐ। इनें कैंपें

च लोके दी दोआई ते इलाज दे अलावा उनेंगी साफ-सफाई, सुरक्षित पानी ते इस्तेमाल ते बमारिए कोला बचाव बारे जागरूक करने दे कन्नोकन्नी एहदे हालात दा मजबूती कन्नै मकाबला करने लेई मानसिक ते मनोवैज्ञानिक तौरा पर बी तैयार कीता जा'रदा ऐ। इस बारे आकाशवाणी समाचार कन्नै गल्ल करदे होई सीनियर मेडिकल अफसर ते जिला योग संयोजक डॉ. मसूद इकबाल जरगर होरें आखेआ।

<><><><><><>

Weather

जम्मू च अज्ज बड्डलै थमां गै भारी बरखा बरै करदी ऐ। मौसम विभाग नै बी अज्जै थमां लेइयै औंदी 2 सितम्बर तगर जम्मू खिते दे बक्ख-बक्ख हिस्सें च दरम्याने दर्जे थमां भारी बरखा बरने दी पेशगोई कीती ऐ। मौसम विभाग दे ड्रैक्टर डाक्टर मुख्तार होरें दस्सेआ ऐ जे अज्ज जम्मू, कठुआ, रजौरी, रियासी, डोडा, रामबन, किशतवाड़, सांबा ते उधमपुर च भारी बरखा बरने दे असार न। मौसम विभाग नै इस दरान बदल फटने, चानचक्क हाड़ औने ते ल्हास-पस्सियां पौने दी चेतावनी जारी करदे होई बसनीकें गी गुजारिश कीती ऐ जे ओह सोहगे-सतर्क रौहन ते कुसै बी एमरजेन्सी दी सूरतें च 112 नम्बरें पर राबता करन।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे

बशकार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रेजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू अज्ज संज्ञा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>